

# Wulf Wagers wunderliche Weltbetrachtung

## Dschogga em Wendr

I dät Ihne empfehla, mit em Dschogga a'zufanga. Mr muass heitz'tag nämlich ganz schö weit weit laufa, damit mr rechtschafene Menscha trifft...

Die Meischte laufat dort na, wo se moinat, dass ebbes läuft. Also i net. I mach bloß ebbes für mei Xondheit ond mei Gwicht.

Neulich, wo's grad so schee frisch gschneit ghet hot, ben i dschogga ganga, wie i des meeglischt Älldag mach. Es war saukalt ond nass und i war noch ra Dreiviertelstond grad scho wieder auf em Rückweg, wia mir auf dr Stroß neba mir en Schneepflug mit ama jessasmäßiga Zacka entgegabrettert isch. I war ganz in Gedanka versonka ond han gar net so schnell ens Feld sprenga kenna, wie sich a Lawine aus Schnee-



matsch ond Stroßadreck aus etwa drei Meter Höhe komplett über mir auskotzt hot. Auf oin Schlag war i net bloß soichnass von Kopf bis Fuaß, sondern au dreckat wia Wildsau, die sich frisch em Lehm gsuhlt hot.

Also i ben sonscht a friedliebender Mensch, aber die Flüach, dia i do uf oimol laut en Landschaft gmeiselt han, send hier net druckbar. Bätschnass ond fruschiert ben i hoimzoggelt. Domm

glaufa. Es laufat halt me Esel auf zwoi Fiaß als auf vier.

Mei Nochbr - a Beamter - goht emmer mit seim Hond dschogga, des hoißt mr no „Dogging“. Aber a Beamtalaufbahn hot mir laufa nix zom doa. Do wirsch bloß ebbes, wenn de auf Deim Sessl hocka bleibst ond da Kopf so wenig wie möglich aus dr Masse rausstreckstsch.

Mr ka gega s' Laufa saga, was mr will, aber es laufat sich immer no mehr Kranke xond, als Xonde krank! Ob Dschogga alerdings vor Herzinfarkt schützt, isch net sicher. Sicher isch aber, dass Herzinfarkt vor Dschogga schützt.

Bleibat xond!

Bis näggschd Woch'.

Ihr

Wulf Wager